




Sabtu, 02 Januari 2021
Ogen: 1 Kronika 28: 20-21



Tetap Ukur Ras Tutuslah



Pedah guna tetap ukur dinggen tutus, ipeseh Daud man anakna Salomo. Sebab enggo seh paksana maka Rumah Pertoton ibangun me. Janah ate Dibata pe labo Daud simbangunsa tapi anakna Salomo. Mbelin pengarapen Daud maka anakna labo ndekah i bas ukur erbera-bera: uga kerna menakenca bangunen e, uga kerna proses pagi pembangunenna, janah uga ka kenca dung ise ertugas i bassa. Emaka tangkas ituriken Daud kerna si ertugas pe, imam-imam ras kalak Lewi enggo merincuh nampati dahin i bas rumah pertoton e janah rayat pe sikap ndahiken kai si perentahken Salomo. Tentu ulih pedah enda eme ketenengen, i bas ukur Salomo lanai erbera-bera. Sebab enggo bage si ituriken bapana bana.

Perlu kepe kata-kata si peseh man anak-anakta ras man isi jabunta lako petetap ukur. Seh maka teneng dinggen dame pusuhna, semangat pe ia ndalani kegeluhenna subuk bas menaken dahin, menaken persekolahen, menaken jabu ras sidebanna. Ma rusur nge lit waktunta ercakap-cakap bas jabu guna mereken ketenengen, kedamen man mamre bage pe man anak-anakta? Pengalamen pemena bas geluhna wajar mahanca ia mbiar, aru ate. I je me peranta selaku nande mahanca ia reh semangatna ndalanisa kegeluhenna.

Bage me pe kegeluhenta selaku kalak si tek man Tuhan. I bas ndalani tahun si mbaru, melala si mbaru nandangi reh subuk bas perbeben, entah keriahen, subuk sakit pinakit entah ekonomi si kurang. Persekolahen ras pendahin anak-anak banci saja jadi tangkelen deba perjabunna si lenga erkedungen. Pinakit social banci saja lenga ngadi jadi ancamen bas geluhta si la maba dame ras ketenengen. Virus corona pe labo lit si njaminsa ngadi i bas tahun enda, ancamen radikalisme ras teroris si tetap lit bas negaranta. Bencana alam bagi longsor, banjir, kepesengen, erupsi gunung berapi tetap jadi bunga-bunga kegeluhen. Adi si ukuri banci turah kebiarenta mentasi tahun si mabru enda. Mekatep i tengah perbeben nggeluh, kote kita, mbiar dinggen seh aru ate pe. Wari peduaken i bas tahun enda ipetetap Dibata ukurta niNa, “Aku tetap ras kam seh ku kedungen zaman” (Mat. 28: 20). Tetapken ukurta!